



Uživanje osnovnih sloboda



Misija podržava Bosnu i Hercegovinu u naporima koji imaju za cilj unapređenje i usklađivanje zakona i prakse s međunarodnim standardima ljudskih prava u vezi sa slobodom mirnog okupljanja i udruživanja, slobodom izražavanja (uključujući slobodu medija) i slobodom vjeroispovijesti ili uvjerenja.

Misija prati primjenu međunarodnih standarda ljudskih prava praćenjem rada

institucija za provođenje zakona tokom mirnih okupljanja, predmeta pokrenutih protiv

prosvjednika, novinara i branitelja ljudskih prava. Pored toga, Misija promoviše preporuke za podršku vlastima u osiguravanju usklađenosti s međunarodnim standardima i zalaže se za unapređenje pravnog okvira kojim se uređuje uživanje osnovnih sloboda.

Misija koristi jedinstvenu mrežu svojih terenskih ureda kako bi osnažila kontakt sa braniteljima ljudskih prava, organizacijama civilnog društva, novinarima i predstavnicima vjerskih zajednica u cilju poboljšanja razmjene informacija, posebno u vezi s bilo kakvim slučajevima prijetnji ili napada.

Misija pruža odgovarajuće obuke ključnim partnerima, uključujući institucijama za provođenje zakona, organizacijama za ludska prava, članovima pravosuđa, medija i političkim predstvincima.

Sloboda okupljanja i udruživanja

Usko sarađujući s relevantnim organima i institucijama, Misija se uključuje u brojne zagovaračke napore širom BiH s ciljem unapređenja zakonodavnog okvira kojim se uređuje sloboda mirnog okupljanja. Misija ima savjetodavnu ulogu tokom procesa izrade i donošenja zakona i podzakonskih akata koji se odnose na slobodu mirnog okupljanja i udruživanja, kako bi se osigurala potpuna usklađenost s međunarodnim standardima i praksama ljudskih prava OSCE-a i Vijeća Evrope. Misija se bavi izravnim i sistematskim praćenjem stanja, izvještava o mirnim okupljanjima i održava blisku vezu sa institucijama za provođenje zakona i braniteljima ljudskih prava. Pored toga, Misija pruža redovne obuke i mogućnosti profesionalnog razvoja predstavnicima policijskih agencija, pravosuđa i organizacija civilnog društva.

Sloboda vjere ili uvjerenja

Misija se zalaže za zaštitu i promociju prava na slobodu vjere ili uvjerenja i radi na utvrđivanju i uklanjanju prepreka koje utiču na uživanje ovog prava. Takvi izazovi uključuju napade na vjersku imovinu ili službenike, govor mržnje i opći nedostatak međureligijskog dijaloga na lokalnoj razini, kao i pitanja koja se tiču viših nivoa, poput restitucije imovine i postizanja sporazuma između države i vjerskih zajednica.

Pored toga što prati ključne događaje koji utiču na slobodu vjere ili uvjerenja u BiH, Misija pruža obuke o slobodi vjere ili uvjerenja, međunarodnim standardima iz oblasti ljudskih prava i domaćem pravnom okviru za predstavnike vjerskih zajednica, lokalnih vlasti, članove lokalnih komisija za saradnju s vjerskim zajednicama i aktiviste civilnog društva.

Misija se oslanja na komunikaciju sa svojim terenskim uredima u praćenju takvih događaja širom zemlje.

Nadalje, Misija sarađuje s Međureligijskim vijećem BiH i njegovim lokalnim odborima za međureligijsku saradnju kao ključnim akterima u promoviranju međureligijskog dijaloga.

Sloboda izražavanja

Misija promovira sigurno radno okruženje za sve novinare i medijske stručnjake u BiH. U ostvarivanju ovog cilja, Misija naglašava da je BiH dužna poštovati Odluku Ministarskog vijeća OSCE-a o sigurnosti novinara iz 2018. godine¹.

Mreža službenika za ljudska prava Misije prati stanje u vezi sa prijetnjama, zastrašivanjem i uznemiravanjem novinara i sarađuje sa organima vlasti u cilju ostvarivanja pravde. Pojedinačni napadi protiv novinara se prijavljuju Kancelariji predstavnika OSCE-a za slobodu medija i redovno se javno osuđuju.

Nadalje, Misija prati građanske, krivične i prekršajne postupke protiv novinara i medijskih kuća u BiH te prikuplja i analizira podatke u vezi s tužbama protiv

njih radi pružanja konkretnih preporuka svim nivoima vlasti.

Misija pažljivo prati usvajanje novog medijskog zakonodavstva u BiH i zalaže se za transparentnost vlasništva nad medijima, posebno što se tiče javnog finansiranja medija.

U saradnji sa Vijećem za štampu BiH, Misija organizira radionice za izgradnju kapaciteta za novinare i urednike, pružajući im nove smjernice za izvještavanje o pitanjima ljudskih prava na lokalnom nivou.

OSCE smatra da su pitanja ljudskih prava ključna komponenta sigurnosti. Predstavnik OSCE-a za slobodu medija ima ulogu ranog upozoravanja i brzo reagira u slučajevima ozbiljnih kršenja slobode medija ili izražavanja.

Predstavnik ima mandat da prati razvoj događaja u vezi sa medijima u državama članicama OSCE-a i da promoviše potpunu usklađenost sa principima i obavezama Organizacije u ovoj oblasti.

¹ Dostupno na <https://www.osce.org/chairmanship/406538>.

Pratite Misiju OSCE-a u BiH



Misija OSCE u Bosni i Hercegovini

Fra Andjela Zvizdovića 1, UNITIC Toranj A
71000 Sarajevo
Bosna i Hercegovina

Tel: +387 33 952 100
Fax: +387 33 442 479
press.ba@osce.org
www.osce.org/bih